

UKUPÓKA IKIPÁTA KYA

NDÚGU UKUFÚMA PA LUGÉLO

🦋 Nguswiga ukuti...Umwe mumenye, une ndinilinogono ilinini, ukufwana, ukubabona abandu bimile akabalilo kako uswe tukubala i Lisyu. Ngimba umwe mutikwikyela na ikyo? Uswe tukwima ukufinga ubumobwene, uswe tukwima panongwa ya ikisu kyitu, fiki tukutoligwege ukwimilila ku Lisyu lilino?

2 Bo uswe tukwima pa kabalilo itolo. Une nabalaga isya kapango, amasiku aga gakindilepo, kangi une ninogonaga nkilo isya bandu aba bammwimilaga Kristi. Linga ugwe ukabombapo ikyene, ngimba ukubagila ukubomba umwisyugu?

3 Aaliko undumbilili unkulumba, ukufwana ifyinja malongo mahano na mabili ni fihano ifi fikindile, une ngabagila itolo ukwinogona isya ngamu yake. Une ngwinogona umwene aali yo Arthur McCoy, kangi umwene aakilenie ikisu. Kangi ubisiku bumo umwene aalotaga injosi ukuti umwene aabukile ku Mwanya. Kangi aayobaga ukuti umwene aabukile ku Kipata, kangi alinkuti abene balinkusita ukumwitikisya umwene mula. Kangi aayobile umwene alinkuti, “Une ne Arthur McCoy ukufuma ku United States. Une ne ndumbilili.”

4 Polelo undindilalakipata alinkwingila, (lilino iyi yali njosi), kangi umwene aalingile mula, alinkuti, “Une gutoligwa ukuyaga ingamu yako mosa.”

Umwene alinkuti, “Naloli, Une naali ndumbilili.”

Umwene alinkuti, “Nkulumba, une . . .”

5 Umwene alinkuti, “Naloli, ngima pamo ukuti . . . Kilipo kimo kitamisye.”

6 Umwene alinkuti, “Umma, tata. Une ndi ni Buku apa. Une ndoligwe ukuyaga ingamu yako mosa.”

Kangu umwene alinkuti, “Ena, ngimba mbagile ukubombapo kamo isya ikyene?”

7 Umwene alinkuti, “Ugwe ubagiile ukusitaka ku Bulongi bwa Kikota kya Bwikemo.” Kyala, ndula. Une ndikulonda ukuya kula.

8 Umwene alinkuti, “Momumo, linga ulu lusubilo lwangu ulwabumalikisyo, une ngusakisya ukuti ngusitakaga inongwa yangu.”

9 Kangi umwene polelo umwene aalinogwine umwene aasokilepo, kangi itolo . . . Kangi bo umwene andaga, alinkuti ukwene kwali ngisi, kangi ukwene kongelelaga kwelukapo nu

kwelukapo, kangi alinkuti kwaboneka ukuya bukaliko nu buyo nabumo kuko Ubwelu ubu bwamalilikilaga, loli umwene aali pakati pa Bwene. Kangi alinkuti Umwene alinkuyoba, “Ywani ikusegelela i Kikota Kyangu ikya Bulongi?”

¹⁰ Umwene alinkuti, “Une ne Arthur McCoy. Une ndi ndumbili, ndumile imyoyo mingi ku Kitangalala.”

Umwene alinkuti, “Ngimba ingamu yako yikaalyagigwe mwa Buku?”

“Umma.”

Alinkuti, “Polelo ugwe usitakile ku Nyumbayabulongi Yangu?”

“Ena, nkulumba.”

¹¹ “Ugwe kwambibililaga ubwanaloli. Une ngulonga ukufwana ni ngomelesyo Syangu. Arthur McCoy, ngimba usyobilemo?”

¹² Umwene alinkuti, “Une ninogonaga ukuti nali mundu unnunu fiyo ukufika papo nimege Mbwele bula.” Umwene alinkuti, “Loli mu Kuyapo kwa Bwele bula, une naali ntulwanongwa.” Twesa tukuyaga lulo. Ugwe ubagile ukwipilika mpokigwa lilino, loli guulila ukafike Kula. Ngimba ugwe kwinogona ukwipilika ukwene kukuya bulebule akabalilo kako Umwene ikonelela? Mumo ugwe kwipilikila ukuya nmini! Ngimba kwisakuyaga bulebule ku Kikota Ikyelu ikya Bulongi?”

Umwene alinkuti, “Ngimba ugwe uyobilemo ubusyobi?”

¹³ Umwene alinkuti, “Une nigononaga une naali gwabwanaloli, loli utundu tumo utunini utu une ninogonaga ukuya tunini utusyobi utwelu, ubwene bukuya bunywamu kangi butitu Kula.”

Umwene alinkuti, “Ena, nkulumba, une njobilemo ubutungulu.”

Umwene alinkuti, “Ugwe uhiyilemo?”

¹⁴ Umwene alinkuti, “Une ninogonaga ukuti naali gwabwanaloli ukufwana na ikyo, nukuti ngibamo siku,” loli alinkuti, “mu Kuyapo kwa Bwele bula, une—une ndinkwaga bwalipo ubukomu bumo ubu une nakwabile, ubu itolo bukaali bununu umma.”

Umwene alinkuti, “Ena, nkulumba, une nhiyilemo.”

Umwene alinkuti, “Ukutumula kwangu . . .”

¹⁵ Kangi umwene itolo aalitendekisye ukupilika ukutumula kwake, “Bukaga ku moto ugwabwilanabwila ugu gwatendekigwe kwa setano na bandumi bake,” alinkuti ififupa fyosa fyasopokaga.

¹⁶ Alinkuti, “Une naapilike Amasyu amanyafu une aga ngapilikamo siku mbumi bwangu.” Umwene atile, “Akabalilo kako une nasukaga ukuketa, une nakibwene ikisyo ikinyafu iki ngaketamo siku; ikitenenefu ukukinda ikisyo kya yuba,

amasyu amanyafu ukukinda aga angolilemo yuba gwangu.” Alinkuti, “Une ndinkukelengania. Une napilike Amasyu, gikuti, ‘Tata, isyo syabwanaloli, umwene asyobile kangu umwene akaali gwabwanaloli. Loli, pasi pa kisu umwene alimile na Une,’ alinkuti, ‘lilino Une ngwimmwimilaga ubuyo bwake.’”

¹⁷ Isyo syo une ngulonda sikaboneke Kula. Une ngulonda ukwimila Umwene lilino, ukuti, akabalilo kala kakwisa, Umwene anyimiile mbuyo bwangu.

¹⁸ Uswe tuli bala ukufuma Bwandilo 22: mulinini lya 15, lya 16, lya 17, kangu lya 18.

Kangu ugwandumi gwa NTWA alinkunkolela Abrahamu ukufuma ku mwanya akabubili.

Kangu alinkuti, Panimwene une mfingile, ikuti UNTWA, pakuti panongwa yakuti ugwe ubombile ikindu iki, kangu ukambanilila umwanundumyana gwako, umwanundumyana gwako yumo ntiga:

Ukuti ndusayo Une nisakukusayaga ugwe, . . . ukwibasya Une nisakukubasyaga imbeyu yako bo sindondwa sya mmwanya, kangu bo gu nsanga igi gili pa luloboko lwa nyanja; kangu imbeyu yako yisakupokaga ikipata kya ndugu gwake;

Kangu nduyungu lwako ifikolo fyosa nkisu fisakusayigwaga; panongwa yakuti upilikile ilisyu langu.

Unko twipute.

¹⁹ Tata Gwakumwanya, ega ilisimbo lilino, Gwentwa, kangu lumbililaga kwa uswe. Mbepo Mwikemo alipimba a Masyu, Gwentwa, kulakula ku ndumbula yiliyosa. Ikyo kikufwanaga ni nsubilo syitu pamusi apa, kabuno isyene syo nywamu, Gwentwa. Kangu mumo Ugwe utubulile uswe ukusuma mbwingi, ukuti ubusangalufu bwitu buyefukege. Uswe tukusuma ikyene mu Ngamu ya Yeso. Ameni.

Umwe mulitugasya.

²⁰ Linga une mbagile ukulikolela ilisimbo ili, kukabalilo kanini. Amasyu gangu monywa, polelo iyo yo nongwa une ngufimbilisigwa ukwima kifuki ni kyakuyobelapo. Une mmenye amasyu gikugomokela, loli uswe tukwitikaga ikyo panandi. Une ngulonda ukukakolela akene, *Ukupóka Ikipáta Kya Ndúgu Ukufúma Pa Lugélo.*

²¹ Ubuyo bwitu bukwiguka pa bumo mwa mbuyo ubuswigisye ukukinda mwa Abrahamu. Umwe mumenye ukuti Abrahamu yo tata gwa balwitiko. Kangu ulufingo lwapegigwe kwa Abrahamu. Kangu ukuya itolo bingilakilingo nu mwene, ukwisila mwa Kristi, yo njila yene uswe tukwambililaga ulufingo lula, yo kwisila mwa Abrahamu. Lilino, Abrahamu ali itolo mundu bo aligwesa, loli umwene akoleligwe na Kyala kangu aligwalwitiko

ku bukolele bula. Akabalilo kako Kyala ayobege kumwene, Abrahamu nakabalilo nakamo siku alilamwilemo i Lisyu lila. Umwene alimile palapala ni Lyene. Kali kyali kikafu bulebule, umwene alimile palapala ni Lyene.

²² Kangi umwene afigiligwe umwanundumiana. Kangi umwene aagulile ifyinja malongo mabili na fihano, ukukikolela kilikyosa iki kyalwanaga na ikyo ukuya kikakikyo umma. Kangi polelo, kangi mwa mwanundumyana uyu, ifikolo fyosa ifyankisu fyayaga pakusayigwa. Kangi ugwaluyungu uyu ali gwalwitiko ku bukoleligwe bwake ni Lisyu ilifingigwe.

²³ Umwene ali kyakutelelelapo kwa ikyo uswe tubagile ukuya. Lilino uswe, ukuya bafwe mwa Kristi, uswe twa luyungu lwa Abrahamu.

²⁴ Lilino, syalipo imbeyu sibili sya Abrahamu. Yimo mwa syene yali mbeyu yakipeligwa; iyingi yali Mbeyu yamwambepo. Yimo mwa syene yaali yakipeligwa, iya mbili gwake; iyingi ya isyene yali Mbeyu ya lwitiko, ulwitiko, ukuti uswe tubagile ukya Luyungu lwa Abrahamu ukwisila mu Lisyu alifingigwe.

²⁵ Kangi lilino bo umwene agelile ku fyinja malongo mabili na fihano, kangi, mbuyo bwakuya monywa, umwene ayaga gwamaka. Muketile, linga ikyene kyaatoligwe ukuboneka, nkyinja kyakwanda, ikyinja ikikwisa ikyene kikuyaga kiswigo ikikulumbapo, panongwa yakuti ikyene kili ni finja fibili mbukulu. Kangi umwene abikile ifyinja fila pamwanya pakinine, bo umwene ukikukangala, kangi umbili gwake ulinkufwa. Ififuba fya Sarah, ikifuba, pamo ikyene (kyayaga) kyaali kyumba. Kangi polelo amaka gake gaabukile, kangi gakalipo na . . . Ikyene kikabagiile ukubombigwa.

²⁶ Ngimba ugwe gwinogwinemo iki Kyala aabombile pala? Muketile, Umwene fiyo akapelile itolo siku ukuti ikifuuba kyake kiyege kyambolela. Kabuno, kumbukilaga, linga Umwene aabombile ikyo, kokuti kumbukilaga linga Umwene aabombile ikyo. . . abene bakali nafyo ifi botolo fya bwifyusi nu kwitendekesya, amasiku gala, ukumpa umwana, ulupyu ukufuma ku ng'ombe. Muketile? Umwene yope afimobilisigwaga uku. . . Indepa syake isya lupyu syalyumile. Polelo Umwene—Umwene akabagile uku. . . Ikindukimo kyafumbilisigwaga ukuboneka.

²⁷ Polelo, keta unkinkulu, ifyinja mia yumo mbukangale, ukubuka nkupapa. Indumbula yake yikaabagile ukufwanikisya ikyo. Ukwene kukafu ku nkinkulu, ifyinja malongo mana, ukubomba ikyo. Indumbula yake yikaabagile ukwima na ikyo. Polelo umwe mumenye iki Umwene aabombile? Linga umwe mukuketesya. . .

²⁸ Lilino une mmenye bingi babagile ukukana. Linga iki kili kanunu ukuyoba ubufumusyo ubu? Muketile, une. . . Ukwene kukuyaga itolo minogono gangu gene.

²⁹ Muketile, i Libangeli yo Buku unkindefipeligwa. Ilyene lisimbigwe ukuti lifisiigwe ukufuma ku masukulu, ababalakya. Ngimba balinga mamenye ikyo? Yeso alinkupalisya kwa Kyala. Umwene alinkuti, “Ngukupalisya Ugwe, Tata, Ugwe ufisile Ilyene ku bamahala na bakomu, kangu usetwile Ilyene ku bana ukuti abene bo manyilege.” Ilyene yo Buku gwa lugano. Akabalilo kako ulugano lwa Kyala lukwisa ku ndumbula, polelo ugwe kuya ndugano na Kyala, polelo Umwene ikwisetula Mwene, ukusanusya kwa Libangeli. Ulsanusye lwa Libangeli yo Kyala Mwene ikusanusya ifingo Syake. Loli, i Libangeli, Ilyene lisimbigwe pakati pa lisimbilo.

³⁰ Lilino, fifwene bo unkasi gwangu, o, umwene yo nkinkulu unnunu ukukinda bosa nkisu kyosa, kangu une nunganile fiyo umwene. Umwene anganile une. Polelo akabalilo kako une nsokilepo, umwene ikunsimbila une ukalata, ikuti, “Nkundwe Bill, ikilo iki une itolo mbagonike abana. Une nsukile umwisyugu,” kangu na fyosa ifi umwene abombile, ni findu ifingi. Lilino umwene ikuyoba isyo pa kalata. Loli, umwe mukete, une nunganile umwene fiyo, kangu uswe tuli fiyo bo mundu yumo, mpaka une—une mbagile ukubala pakati pa masimbo. Une mmenye iki umwene ikulonda ukuyoba, muketile, kali umwene ikumbula ikyo pamo mma, muketile. Une—une mmenye iki umwene ikusanusya, panongwa yakuti ulwene lugano lwangu ku mwene, kangu kupilikisya kwangu.

³¹ Ena, iyo yo njila iyi i Libangeli lisimbiligwe. Muketile? Aba—aba sukulu bikubukaga itolo pa mwanya pa ikylene; abene batisa siku ukukupilika ikylene. Muketile, ugwe kufimbilisigwa ukuya ndugano ni Lisyu, Umwene, “ukummanya Umwene.” Muketile?

³² Lilino, lilino muno, ketesya iki Umwene aabombile. Lilino Abrahamu na Sarah bosa bakangeele, “bakomigwe-fiyo,” i Libangeli likuti. Lilino iyene yikaali nongwa yakuti abene baali itolo bandu baalitugesye kula kabalilo katalipo umma. Ilibangeli lyatile, “Abene bakomigwe-fiyo mbukangale.”

³³ Lilino ketesya, ukufuma papo Ugwandumi uyu abonekege, uswe tukuyobapo isyayumwene; uyu yo aali Elohim, Kyala. Kangu Umwene alinkuti, alimbulile Abrahamu, “Une nguuyatilaga ugwe ukufwana na kabalilo ka bumi.” Lilino ketesya ukwikilila mosa ukukinda, abene baali kyakwimilila kya Kipanga, injila yosa ukukinda.

³⁴ Lilino keta. Ifi fyo ifi fyabonike. Lilino, Umwene akagambike itolo Sarah umma, nu kun’gambika Abraham umma. Umwene alinkubasanusya abene ukugomokela ku ndumiana nu ndindwana. Lilino ikyo kibagile ukuboneka ukuya kihesya, loli ketesya i Lisyu lyosa ilinine, kangu nukubika palikimo. Ilsyu lipakigwe, kangu ugwe kufimbilisigwa ukupakigwa ni Lisyu. Lilino, kumbukilaga, nakalinga ukufuma palapala, nakalinga ukufuma kububoneko bwa Gwandumi. . .

³⁵ Une mbagile ukuketa ikyo, inywili imfubifu isya Sarah, umbuya unnini nikitambala kyake pakibega, kangi nakatili kalufumbi, akolile ingili, ikusyungutila. “Une, njege mbusangaluke nu ntwanga, kangi umwene nkangale, yope?” Muketile? Kangi apa aalipo Abrahamu, indefu indali bo ulu, ikolekisiye ku ngili, mumo umwene aayilile, akomigwe-fiyo mbukangale.

³⁶ Kangi une nguketa, ulubunju lwakilabo kyake, ifibega fyake filinkufyukila mmwanya, inyuma yilinkugoloka. Inywili syake silinkwanda ukusanuka. Abene balinkugomokela ku ndumiana nu ndindwana. Ukubonesya itolo isi Umwene ikubombaga ku Luyungu lwa Bunyafyale bwa Abrahamu, muketile, akabalilo kako uswe tu “sanusigwege nkabalilo, mukukop’fikope fya liso, nukunyakiligwa palikimo.”

³⁷ Ketesya isi syabonike. Lilino ndisisimikisya iki kwa umwe. Lilino abene balyegilepo injila ukufuma pa buyo bula apa abene baali, pala pa Gomora; kangi babukile injila yosa yila ukubuka ku Gerara, ukusulukila ku kisa kya ba Filisti. Umwene muketisiye? Pima umwe pa mapu, kutali bulebule ukwene. Yaali njila ndali ku bandu babukangale ubu.

³⁸ Kangi polelo, palubafu pa ikyo, mu—mu kisu kya ba Filisti kula, aaliko umwalafyale unnini Abimeleki ingamu, kangi umwene alondaga ukweg’unkikulu. Kangi umwene aali nabo bosa abalindwana ba ki Filisti abamogi bala, loli bo umwene ambwene umbuya, umwene atile, “Umwene yo mmogi ukunketa umwene,” kangi umwene alinkugwa ndugano nu mwene kangi aalondaga ukummweg’umwene. Isyo syo ndalusye. A-ha. Muketile, umwene aali mmogi. Muketile?

³⁹ Umwene asanwike ukugomokela ku bulindwana. Ketesya, umwene afumbilisigwaga ukubomba ikyo, ukuti apap’umwana. Kyala alinkupela umwene ayege kipeligw’ikipya. Kangi umwene afimbilisigwaga ukuya, ukuswil’umwan’uyu. Kangi kumbukilaga, Abrahamu, “umbili gwake gwafwene itolo bo mufwe,” kangi Sarah afwile akabalilo kako Abrahamu aali. . . Isaka aali ni fyinja malongo mana na fihano, une ngusubila, akabalilo kako u Sarah afwege. Kangi Abraham alyegile unkikulu uyungi kangi umwene ali na banabalumiana bahano na babili palubafu lwa banabalindwana, ukufuma apo. Amen.

⁴⁰ Muketile, balaga pakati pa masimbo. Ikyene kyo kyakwimilila. Ikyene kikubonesya apo iki Umwene ikubombaga pa Bana bosa ba Abrahamu. Uswe tukusegelela itolo ku ikyo lilino, polelo ifibega ifi finamile pasi na filifyosa fikanimbombo umma, binangu. Kangi inywili syitu imfubifu kangi ikylene kali kiliku, ifyene fikaya ni mbombo lilino. Uswe tutikuketa kunyuma’mma. Uswe tuli bukaaga nkyeni kuko uswe tukubukako.

⁴¹ Kangi kumbukilaga, ikimayilo iki uswe tukuketa, kyaali kimanyilo ikyabumalikisyo iki Abrahamu na Sarah gwake

bakibwene, bo umwanundumiana unfingigwe ikwisa kukuyapo. Uswe tukwitika tuli mu sala yila.

⁴² U mweneluyungu, ukufuma papo undumiana uyu apapigwege. . . Ngimba umwe mubagile ukwinogonela Isaka, ali ni fyinja kalongo na fibili; akalumiana akamogi, akanini, utumaso utunini utwa bulauni? Une ngwinogonela mumo mama yula ipilikilaga; undindwana ummogi, kangi polelo, kangi tata gwake. Kangi ilisiku limo, Kyala alinkuti, lilino, ukufwanikikisya itolo; uswe tukilenie, isala iyene yo yikwisa. “Une ngupelile ugwe tata gwa fikolo, ukwisila mu ndumiana uyu, loli Une ngulonda umwege undumiana uyu ufyuke nagwe ku kyamba iki Une ngukunangisyaga ugwe, kangi Une ngulonda ugwe ukungoga umwene pala, ukuya kwiyipapa.” Ngimba mubagile ukwinogonela ikyo?

⁴³ Lilino ugwe siku ukalalusigwamo ukubuka ku lugelo bo ulu. Umwene atikubomba ikyo lilino. Ikyo kyaali kyakuketelapo, misyungulu.

⁴⁴ Ngimba Abrahamu aali nu lutende? Umma, nkulumba. Abrahamu ayobile iki, “Une nsongigwe mosa ukuti Umwene abagile ukunsusya umwene ukufuma ku bafwe, kabuno une naalimwambilile umwene afwanaga bo yumo afumile ku bafwe. Kangi linga ululagilo lwa Kyala lula lumbuulile une ukubomba ikyo, kangi une nimile gwabwanaloli ku ikyo, kangi ikyene kitabwile, ukumba une umwanundumiana; Kyala abagile ukunsusya umwene ukufuma ku bafwe; ukufuma kuko une nnalimmwambilile umwene, ukuya nsyungulu.”

⁴⁵ O, mwe, mwinangu! Linga Kyala abapele umwe Bapentekosti u Mbepo Mwikemo, ukuyobela mu ndimi, ko kongelapo kuki uko umwe mubagile ukwitika amaka Gake agakubumbulusya, kangi ubununu Bwake ni kisa! Linga Umwene aabombile ikyo, ukulwana na bosa ababalasyakyala nkisu! Abene balinkuti ikyo kikabagila ukubombigwa, loli Kyala aabombile ikyene panongwa yakuti Umwene aafingile ikyene. Polelo ima pa Ndusu yako, Ilisyu lyako, Ulubo lwako, itika Ilisyu lya Kyala. Kyala aayobile mulamula, kangi ikyo kikumasyainongwa ikyene!

⁴⁶ Ketesya, lilino, umwene kyalimmwegile amasiku matatu ukwenda ukufuma pala, ni mbunda. Lilino une mbagile ukwenda, akabalilo kako une ndi pa lwendelo, une nendilepo ama mailosi malongo matatu ilisiku lililyosa, ukukinda mmatengele; kangi uswe tuli na malundi ga magali, ukuyoba bo ulu. Loli abandu bala, ukwiyendesya kwabo kwene, kwaali pamo ukwitoga imbunda pamo—pamo ukwendapasi. Kangi umwene aabukile injila ya masiku matatu ukufumila kuno aaliko, kangi umwene alinkufyusya amaso gake, kula ku lulanga, nukuketa ikyamba pa butali.

⁴⁷ Umwene alinkummwega Isaka nukupinya amaboko gake. Iki, uswe twesa tumenye, mu Bwandilo 22 apa, kyaali

kyakwimilila Kristi. Ukundongolela umwene pa kyamba, apinyigwe, bo yu Yeso alongoleligwa pa kyamba, Kyamba Kalvari; ikyakwimilila Kyala ikupa Umwanundumyana Gwake, ena.

⁴⁸ Loli akabalilo kako abene bafikege kula, kang'i umwene ali mpilikile, Isaka alinkwanda ukuya na mabyebye. Umwene atile, "Tata, imbabu syo isi, iki kyo kigemo, u moto go ugu, loli ik'yabupi kyo kiliku?"

⁴⁹ Kang'i Abrahamu, ukuti aamenye mminogono gake, loli i Lisyu Iya Kyala limile pala, umwene alinkuti, "Mwanangu, Kyala abagile ukwiyipa Mwene ik'yabupi." Umwene alinkubukolela ubuyo bula, "Yehova-Yire."

⁵⁰ Kang'i akabalilo kako umwene ampinyege umwanake, umwene apilikilaga mpaka bufwe; ukundambalika umwene pa kigemo, ukusosya ulubo ukufuma munyambi, nukwanda ukwega ubumi bwa mwanundumiana gwake. Kang'i, akabalilo kako umwene atigi, Ikundukimo kilinkukola ikiboko kyake, nukuti, "Abrahamu, imika papo ikiboko kyako."

⁵¹ Kang'i akabalilo kala, ing'osinyambala yilinkummeta, kunyuma yake, ni mbembe syake siitabenie mmatengele.

⁵² Ngimba umwe mwinogonilemo, ko kugu ing'osinyambala iyi yifumile? Kumbukakaga, ikisu kiswiile ni ngalamu na ba kambwe ni mbwa sya mmatengele, ni finyamana fwa kalyang'osi fila. Kang'i umwene ali kubutali bulebule ukufuma kubwigufu? Kang'i, polelo, pamwanya pa bufyuke bwa kyamba, kuno gakayako na misi. Kang'i umwene abungenie amabwe, ukusyungutila, ukuyenga ikigemo. Ing'osi innyambala yila yafumile kugu? Muketile?

⁵³ Loli iyene yikaali mboniboni mma. Umwene agogile ing'osinyambala; iyene yaali nililopa. Ngimba umwene ayobile fiki? "Kyala abagile ukupa ku Mwene ik'yabupi."

⁵⁴ Ngimba *ugwe* kusokangapo bulebule pa kikota ikyo? Ngimba umwana ugwakwifulafulania *yula* isakuyaga kanunu, pamo *ugwe* ukufuma kukikota ikyo, *ugwe* ukufuma kula, *ugwe* ni mbungo ya ndumbula? Kalikosa aka katamisye, "Kyala abagile ukupa ku Mwene."

⁵⁵ Abrahamu alitike ikylene. U mweneluyungu uyu aliimile mbwanaloli ku lufingo. Kang'i Umwene alinkupa ulufingo, ukuti, "Uluyungu lwako! Panongwa yakuti ugwe gwitike Ilisyu Lyangu, kang'i kali syo syakusyungitilanki, uluyungu lwako lwisakupoka ikipata kya ndugu."

⁵⁶ Fiki? Undugu aligwesa uyu isaga, bo gunsyungulu, ukulwana na Abrahamu, Abra-. . . Undugu gwa, "Umwene nkangale fiyo. Une ndinkangale fiyo. Fyosa *ifi*, na filifyosa ifingi." Umwene pope alimile palapala gwabwanaloli ku lufingo lula.

57 Lilino, unnyambala uyu alinalo ulwitiko lula, pope ikwegaga i Lisyu lya Kyala kisitakupasya isyakunsyungutila. Lilino, linga ugwe kutoligwa ukubomba ikyo, kokuti ugwe ukaya Luyungu lwa Abrahamu mma. Ulo lo lwitiko ulu Abrahamu ali nalo, Uluyungu lwake.

58 Ulufingo lwa Abrahamu lwali lwakuti “Uluyungu” lwake, lilino Uluyungu lwabunyafyale, lope, mumo une mbabulile umwe pitasipo. Kangi ikimyato iki iki Umwene ampele Abrahamu, kyali kimyato kya lufingo. Kangi Uluyungu lwabunyafyale, ukufwana na Baefesi 4:30, ba “myatiligwe nu Mbepo Mwikemo,” ukufuma pakwima ni ngelo. Gela ukwinogona pa kyene.

59 Bingi bikwinogona ukuti balinagwe Mbepo Mwikemo. Bingi bikwibikamo ukuti balinagwe u Mbepo Mwikemo. Bingi babagile ukubonesya ifimanyilo ni fika ifya ikylene. Loli, pope, linga ikylene kitikwima ni Lisyu, ikylene kikaya yo Mbepo Mwikemo. Muketile?

60 Ugwe kwitikaga i Lisyu lililyosa, polelo ugwe kumyatiligwa ukufuma pa lugelo. Linga uswe tukwitika ulufingo lulilosa mu Lisyu, polelo uswe tukumyatiligwa na Mbepo, ukusisimikisya ulufingo. Ikyo kyo, kyo iki Abrahamu, injila iyi umwene abombile. Apo, kangi pene apo, po uswe tukuya nubwabuke ukupoka ikipata kya ndugu gwitw. Ugwe ukabagila ikubomba ikyo mpaka ukwanda ugwe kuyaga Luyungu lula. Kumbukila, mwi Bangeli . . .

61 Une nayobile pa iki, ku Houston pamo kumo, kubungi . . . pamo, une ngusanusya ku Dallas. *Ikimanyilo.*

62 Muketile, u—u n’Juda abonesyaga, mula mu Israeli, ukuti umwene aali n’Juda ukwisila mukubutigwa. Loli Kyala atile, “Akabalilo kako Une nguketa ililopa! Kangi ililopa lisakuyaga kwa umwe kimanyilo.”

63 Ubumi ubu bwaali mwilopa bwatoligwaga ukwisa pa mwiputi, panongwa yakuti, ena, iliyene lyaali bumi bwa kinyamana, iliyene lyali itolo nsyungulu ugu gukufyukila ku Bumi ubwabwanaloli. Polelo, unkemo, ililopa lyene, lyabagile ukuya likesefu pa kifigo na pambandama ya kifigo.

64 Lipakigwe nu hisopu, ili lyo lisu ilimelaposa, ukubonesya ukuti ugwe utikutifimbilisigwa ukuya nu lwitiko lumo ulwapamwanya. Ugwe uyege itolo na lululula, ulwitiko ulu ulinalo, kifwane mumo ugwe kulikisyila iligali lyake, ukwisa ku kipanga. Muketile? Abandu bingi bikwinogona abene bikufimbilisigwa ukuya kindukimo . . . Loli, umma, umma, uko ku kusoba. Ulwitiko ulwaposa itolo lo lwene ugwe upakege Ililopa nalo. Pilika i Lisyu, kangi itikaga i Lisyu, pakaga Ilyene, ikyo kyo kyene. Ugwe pimbaga itolo ilisu paliposa pala mu Palestina, aali yo hisopu, ilisu ilinini itolo ili lyaakulaga

mbulenduke bwa fibumba, na posa, liyubikisigwe mwilopa nukubikigwa pa mbandama na pa fifigo.

⁶⁵ Kangi, kumbukaga, une ndikupasya kali abene bali ndwitikano bulinga, ububutigwa bulinga ubu un’Juda aabonesyaga, kali mundu unnununki umwene aali, ulwitikano losa lwamalike pene papo i—i kimanyilo kyali pala. “Akabalilo kako uno nguketa lilopa,” kwene.

⁶⁶ Lilino, Ililopa lilino, Ikimanyilo, kikaya nkemu, unkemu gwa Lilopa lya Kristi, panongwa yakuti Ilyene lyalyoniike ifyinja ma elifu mabili amakinde.

⁶⁷ Loli, umwe muketile, apa i . . . kwafumbilisigwa ukuya nkemo pala, ubumi mukinyamana bukabagile ukwisa pa mundu, panongwa ubumi bwa kinyamana bukaya nago umoyo. Ikinyamana kitikumanya ubwanaloli ukufuma ku busobi. Umwene yo mundu uyi ali nago umoyo.

⁶⁸ Lilino, loli akabalilo kako Yeso, u Mwana wa Kyala, umpapigwe-mundindwana, onile i Lilopa Lyake, u Bumi ubu bwaali mwi Lopa lila aali Kyala Mwene. Ilibangeli likuti, “Uswe tupokigwe nu Bumi, Ililopa lya Kyala.” Somma ililopa lya mu Yuda, somma ililopa lya Gwapanja; loli Ililopa lya Kyala. Kyala aapelile akambakasya ka Ilopa, apapiigwe mu ndindwana. Umwene akalimmenyemo unnyambala nayumo, pamo nukuti umwene . . . pamo nukuti ilifumbi lyafumile ku mwene umma.

⁶⁹ Une mmenye mwe bingi bandu umwe mukulonda ukwitika ukuti ilifumbi lyafumilie ku mwene. Ilifumbi likabagila ukuyapo kisita kupalamasigwa, kyo kiliku iki Kyala ikubombaga lelo? Muketile?

⁷⁰ Umwene alinkupela fyosa ilifumbi na kamakasya ka Ilopa, kangi ikyo kyaali kyakwitugasyamo Kyala, ikikemo. “Une ndisakwitikisya Umwikemo Ntiga Gwangu abukege kububole.” Muketile kuko ilifumbi lyafumiile? “Kangi ndisakundeka umoyo Gwake mu gehena.” Umbili Gwake gwali mwikemo! O, mwe! Ugwe ungabombaga, ugwe ukabagila ukwitikisya ikyo, kwikolelaga bulebule gwimwene ukuya Nkristi?

⁷¹ “Uswe tupokigwe ni Lilopa lya Kyala.” Apo po lulipo ulwitiko lwangu. Komma ukwenda pala mu lilopa lya nsololi, komma ukwenda pala mwilopa lwa mundu aligwesa, pamo ummanyisi, pamo umbalasyakya. Uswe tukwenda pala mu’Lopa lya Kyala. Kyala aayobile isyo. Umwene alinkuya mundu. Umwene alinkusanusya utugoye Twake. Umwene alinkusanusya ikisasa Kyake kuno, nanuswe, kangi alinkuya yumo mwa uswe. Umwene yo Ntabuli Gwabukamu. Umwene afimbilisigwaga ukuya nkamugwitu kwa uswe, panongwa yakuti ulo lwali lulagilo. Kyala alinkuya mundu nukwitugasya na uswe.

⁷² Ketesya mumo ikyo, mukubomba iki, Umwene ikufuma ku Mwene, aali Kyala, u Mbepo, kangi u Mbepo yula ikwisa pa

mwitiki. Polelo, u Bumi ubu bwa mu Kyabupi kyitu, uswe tukumanyigwa nu Bumi bulabula.

⁷³ Lelo abene bikuketaga bulebule u Bumi bwa Kyala bukwenenda mbandu, nukukikolela ikylene kindu kibwapufu, na papo Ikyo kyo kimanyilo kya Kwiyipa kwitu? “Umwene uyu ikwitika pa Une, imbombo isi Une ngumbomba umwene yope isakubombaga.” Ubumi Bwake bukugomokela ku kwiyip-... ukufuma ku Kyabupi, bo uswe tukubika amaboko gitu pa Kyene nu kwiyagania twibene ukuya bafwe ku minogono gitu gene. Polelo tubagile ukwitisya bulebule ifibugutila ukutugutila uswe mfirmanyisyo ni findu, nukuyoba ukuti uswe tukwitika Ikyene? Uswe tuli bafwe ku findu ifyo.

⁷⁴ Paulo atile, “Nakimo mwa findu ifi fikundamyamo une,” kabuno umwene apinyiligwe ku naloliloli yumo, Kristi. Kangi akakukaba kalikosa akabwanaloli kapinyiligwe ku naloliloli yumo, kangi naloliloli gwangu yo Lisyu. Kangi aligwesa uyungi yo, uyu—uyu naloliloli apapigwe mwa Mbepo, u naloliloli gwabo yo Lisyu lya Kyala. Une mbinyiligwe ku Kyene. Une ngubika amaboko gangu pa Kyene. Kangi Ikyene kyaalyegile ubuyo bwangu, kangi une ngwibonesya nimwene nu Mwene. Uswe twaamenye ukuti Umwene aafingile ukwibonesya Mwene na uswe. Ikyo kikutwala ulwitiko ulwabwanaloli; komma ulwitiko lwako gwimwene umma, loli ulwitiko Lwake; ikindukimo iki ugwe utikwendesya. Umwene yo ikwendesya. Lilino ketesya. Apo, kangi pene papo, akabalilo kako i...po ulufingo lukutendekigwa kwa ugwe.

⁷⁵ Kali fipanga filinga ifi ugwe gwingile, kali kalinga aka ugwe gosigwemo; ikisyo kunkyeni, kunyuma, injila yiliyosa iyi ugwe kulonda. Mpaka Ikimyatiko kila kibikigwe pa ugwe, polelo ugwe ukaya nu bwabuke nabumo ubwakwikolela gwimwene ukuya mpinyiligwa ni Kyabupi kyako.

⁷⁶ Kangi Ikimyatiko kya Kyala kyo fiki? Abaefesi 4:30, ikuti, “Somma ukunsulumanisya Mbepo Mwikemo gwa Kyala, kuko umwe mumyatikigwe mpaka Ilisiku lwa kutabuligwa kwinu.” Komma ukufuma ku lusasanio ukubuka ku lungi, loli Bwilanabwila ukolelikigwe ukuti ugwe utabuligwe ugomosigwe.

⁷⁷ Kangi, kumbukaga, linga ugwe ukaalimo siku minogono ga Kyala, ugwe utisakuyamo siku na Kyala. Balinga basimenye ukuti Umwene aali Ntabuli? Ena, polelo, kilikyosa ikitabuligwe kikufimbilisigwa ukugomokela kuko kyagwilile. Polelo linga Umwene alisile pakututabula uswe, tubagile bulebule uswe, twe akabalilo kamo tukabagiilemo ukutabuligwa, kangi uswe twesa “twaapapigwe mu mbibi, twaabumbigwe mbutulanongwa, ukwisa nkisu iki tukuyoba ubusyobi”? Ikyene kikubonesya ukuti u Nkristi ugwabwanaloli yo kiyabo kya minogono ga Kyala, bo ikisu kikaali kikayako, pamo indondwa yimo, pamo imbepo yimo, pamo kalikosa akangi. Ikyene kyo Bwilanabwila, kangi

Umwene aalisile ukututabula uswe ukugomokesya. Ilyene lyo linogono lya Kyala, liyobigwe mu lisyu, libonekiile pabwelu kangi litabw- . . . ligomokile ku minogono Gake.

⁷⁸ Mkamu Ntabuli! Iyo yo nongwa Kyala Mwene afimbilisigwaga ukuya yumo gwa uswe, ukutabula. Nakimo ikingi kyabile ukubomba ikyo. Ugwandumi akabagile ukubomba ikylene, nakimo ikingi. Umwene afimbilisigwaga ukwika pasi, ukugeligwa bo uswe tukugeligwa, ukututabula uswe.

⁷⁹ Ketesya lilino uluyungu ulwakipeligwa ulwa Abrahamu. Unko tuketesye simo mwa mbeyu isyakipeligwa sila, nu kuketa linga Kyala aliimile ni Lisyu Lyake nu luyungu ulwakipeligwa ulu, uyu aali Isaka. Unko tuketesye simo mwa mbeyu isyabupeligwa isi syaalitike ulufingo losa ulwa Kyala kanga sikaali nililalusyo nalimo. Lilino kumbukaga, balipo amalongo ga maelifu ukupapana na maelifu ukupapana gapapene na maelifu aba babuutigwe na filifyose ifinine, kangi pope bakaali Luyungu lwa Abrahamu mma. Naloliloli, “Uyu yo Njuda panja akaya Njuda mma; uyu yo Njuda nkati.” Abene, bingi ba abene, baatoligwe, baatoligwe nububabe.

⁸⁰ Keta, mululanga, abene balinkuti, “Uswe. . .” Ilisiku lya Pasa, pamo ukakunwa ku nyibuko, Yohani Mwikemo 6. Abene bosa basangalwike.

⁸¹ Yeso alinkuti, “Une ne Ibwe lila lyaali mu lulanga. Une ne Nkati ugu gukufuma kwa Kyala, ukufuma ku Mwanya, linga umundu abagile ukulya ukufuma kugwene nukusita kufwa.”

⁸² Abene balinkuti, “Abatata bitu baalile manna ndulanga, ku fyinja malonga mana.”

Umwene alinkuti, “Kangi abene, bosa, baafwile.”

⁸³ *Baafwile*, ega ilisyu lila nukulyendesya ilyene, keta iki ilyene likisanusya, “bapagwike Kwabwilanabwila.” Palema, abene baali mbeyu ya Abrahamu. *Ubufwe* bukusanusya “ukupaguuka, ukuyongesigwa, ukubongotoligwa ukumalisya, ukuyongesigwa.” Yesu atile abene baafwile, gwesa gwa bene, palema abene bali ba Yuda babutigwe.

⁸⁴ Muketile, mwe bayaya bakundwe, panongwa yakuti itolo uswe tuli mu Methodisti, Baptisti, Presbyteri, ndinako akakwilata kanini, ni findu bo ifyo; u setano ikwitika fiyo mumo itolo nuswe tukwitikila.

⁸⁵ Loli ugwe kufimbilisigwa ukwibonesya ni Kyene. Kyala ikwifimbilisya ukuya nubuketi bwa Kyene ku kyene, munjila ya kumyatiko nu Mbepo Mwikemo. Ililalusyo nalimo pa Lisyu!

⁸⁶ Linga ugwe kuti, “Ena, lilino, ikyo kyaali kya lisiku ilingi,” kalipo akasolo apo.

⁸⁷ Bule linga umundu ikubopa ikwisa, kangi ugwe umbilile umwene ubwelu bukubala, kangi umwene ikubopela pasi

kungisi, nukuti, “Une itolo ngukana ikyo. Une itolo ngukana ikyo. Kakayako akandu kamo bo ubwelu. Une ndikwitika iki mma”? Kalipo kamo katamisye nu mundu yula. Umwene aminogono gasyumbutwike. Linga umwene ikukana ubulungule bwa lumuli nu bununu bwake ubwakup’-bumi, kilipo kimo kitamisye numwene, mminogono.

⁸⁸ Kangi akabalilo kako umundu ikuketa i Lisyu lya Kyala, lilinganisigwe pa bwelu kumwene, kangi libonesigwe, kangi polelo ikwigala nukukwabila pasi amakatani ga kipanga kyake, kalipo kamo katamisye nu mundu yula, mwambepo. Kalipo kamo katamisye numwene. Kalipo kamo mwambepo katamisye. Umwene itolo akabagila ukukyambilila Ilyene. “Mfwamaso, kangi umwene atikumanya ubwene,” ikubuka ku Bulongi, kangi Kyala isakuyaga yo Ndongi.

⁸⁹ Ketesya akabalilo kako abene—abene baabombile iki, kangi imbeyu isi lilino isi syaalitike Ilyene, ketesya ifi fyabonike. Unko tuketesya bamo mwa bene lilino, uluyungu lwa Abrahamu.

⁹⁰ Unko twege abana ba Kihiburi, kabuno abene baalimile basubiligwa nukusita kwitikisya isya kwiputa-fifwani. Abene baakanile ukufugamila ku kifwani iki umwalafyale gwa kisu atendendekisye. Ikyene kyabumbigwe ukufuma ku mundu umwikemo, yope, ikifwani kya Daniel.

⁹¹ Kikubonesya ukuti uluko lwa Bapanja lwatwaligwe mumo pasi pa lubafu ulusobi, ulwa kwiputa ikifwani kya mundu mwikemo. Ikyene kikubuka kunjila yilayila, akabalilo kako abandu bisakufimbilisigwaga ukwiputa ififwani fya bandu. Ilyene likwisa mbusetuli, isya Daniel ukuti aabagile ukusanusya i Lisyu, ili lyasimbigwe pa busimbebwakiboko pa kibumba. Iyo yo njila ukwene kwalisiile, kangi iyo yo njila ukwene kukusokela, injila yilayila, iya kifwani kya Gwapanja.

⁹² Ketesya, abene baakanile ukubomba ikyo. Kangi ngimba abene babombile fiki? Abene baali luyungu lwa Abrahamu ukwimilila basubiligwa ku Lisyu, kangi abene baapokile ikipata kya ndugu, ikya moto. Abene babombile ikyo. Ena, i Lisyu lya Kyala lyabwanaloli.

⁹³ Daniel, aageligwe panongwa ya kwiputa u Kyala yumoywene ugwabwanaloli. Umwene aageligwe panongwa ya ikyo. Kangi nkabalilo ka lugelo, umwene afyukile ulugelo. Kangi u Kyala abombile fiki, bo fifwene fyosa fili pasi kumwene, mumo uswe tubagile ukuyobela? Kangi abene bakameenye ifyakubomba. Abene bayaga pakundyesa umwene ku ngalamu. Loli Daniel aalimile nsubiligwa ku lugelo, ukuti aliko Kyala yumo ugwabwanaloli ntiga, kangi umwene aapokile ikipata kya ndugu. Kyala alinkwigala undomo gwa ngalamu.

⁹⁴ Mose alimile nsubiligwa ku Lisyu ilifingigwe, pankyeni pa bakwegelela abasyobi, Yambresi na Yanesi, mu lugelo. Keta, Kyala aalyagene nagwe, ni fika, ukumbula umwene ukuti

akabombe ifindu ifi, akabonesye ifika ifi, kangu ikika kilikyosa kyayaga ni lisyu. Mose alinkwikilila kulakula, nubwanaloli itolo mumo imwene aamanyile. Umwene alinkuyisopa pasi ingili, kangu iyene yilikusanuka njoka. Umwe mumenye isi syabonike? Apa balinkwisa abakwegelela nu kubomba ikindu kilakila.

⁹⁵ Lilino, Mose akatagiile mmwanya amaboko gake, nukuti, “Ehe, une ngusakikisya kyosa iki kisobi.” Umwene alimile pala nu kugulila Kyala. Umwene aalimile nsubiligwa. Kali abakwegelela baalipo balinga, umwene alimile nsubiligwa. Kangu umwene aasubiligwe pa butumigwe bwake, ukubatwala abandu bala ukusoka mbuyo bula, akabalilo kako ikipata kya misi kyaali mu njila, Kyala alinkumwitikisya apoke ikyene, kangu umwene alinkwigula ikipata ni Mbanda ya Moto iyi yandongolelaga umwene. Umwene aalyegile abandu ku kisu ikifingigwe.

⁹⁶ Yoshua, undongosi uyungi unkulumba. Bene babili ukufuma mwa . . . baabukile ku kisu ikifingigwe, Yoshua na Kalebu. Abene bafikaga ku buyo ubukoleligwa Kadeshi, ubu bwali katikati ya kisukyapasi akabalilo kala, mpaka fiyofiyu akene kyali kikota kya bulongi. Kangu, o, abene baatumile kula abetendesi malongo nababili ukutendela ikisu, kangu malongo nababili ba abene baagomokile.

⁹⁷ Kalongo ba abene batile, “O, iyene mbombo ngafu fiyo. Uswe itolo tukaabagile ukubomba iki. Ena, abandu bala, uswe twabonekaga bo mapalalila pa lubafu lwabo.”

⁹⁸ Loli Yoshua abombile fiki? Umwene abakibisye abandu. Umwene atile, “Gulila tasi. Uswe tukundile pakubagila ukukyega ikyene, kali uswe tuli banini bulebule, pamo kali tuli banandi bulebule.” Ngimba umwene abombaga fiki? Umwene imaga nsubiligwa ku lufingo lula, “Une mbapele umwe ikisu iki,” loli umwe mukulwilaga inchi yiliyosa ya ikyene.

⁹⁹ Ngimba ugwe gwitike ikyo, yuba? Kyala akupele ugwe ukubumbulusya kwako, loli kulwilaga inchi yiliyosa ya ukwene. “Paliposa apa ikitende kya kilundi kyako kikukanya, apo Une ngupele ugwe ukuya pako.” *Amakato* gikusanusya “ubwenenafyo.” Ikyene kyako kyosa, ulufingo losa lwako ugwe, loli kulwilaga inchi yiliyosa ya njila yakwingilila lilino.

¹⁰⁰ Lilino, Yoshua aamenye ifi Kyala aayobile. Umwene aali luyungu lwa Abrahamu. Muketile? Umwene alinkuti, “Une ngwitika ikyo, ukuti Kyala atupele uswe ikisu, kangu uswe tukundile pabubagile ukwega ikisu iki.” Kangu panongwa yakuti umwene aafyukile ulugelo, ukulwana ni kibugutila kyosa ikya Israeli, ifikolo fyosa kangu abandu bosa balinkwibubusya nukukuta. Yoshua alinkuti, “Kiba! Kyala aatendike ulufingo.”

¹⁰¹ Kali ugwe ulinnywamu bulebule, kangu ifyakulwana fyo fiki, kangu u dokotala ikuyoba fiki, Kyala apele ulufingo. Ikyene kisyele kwa Kyala ukubomba ikyene.

102 Ngimba umwene aabombile fiki? Bo umwene isile ku kisoko kya Yordani, umwene apokile ikipata. Ikyo kyo iki umwene—umwene aabombile.

103 Yeriko, alinkwikipilila bo yu kayamba nkipapa. Ngimba umwene abombile fiki? Umwene apokile ikipata.

104 Pope ilisiku limo bo undugu agelaga ukummwega umwene, umwene aapokile ikipata kya ndugu gwake fiyo mpaka umwene aalilagile ilisuba ukwima. Kangi ilisuba lilinkumpilikila umwene, kangi lilinkusitakusanuka pa sala malongo mabili na mana.

105 Kyala nsubiligwa pa lufingo Lwake, kali fiki Umwene ikufimibilisigwa ukubomba; ikulondosya Kumwanya bo akaali Umwene ukwitikisya i Lisyu Lyake litoligwege. Umwene akatendekamo siku ulufingo ulu Umwene akabagila ukufwanisya. “Une ne Ntwa ngubumbulusya imbungo syako syosa. Linga abene bikubika amaboko pa babine, abene bisakubumbulukaga.” Ameni. “Linga ugwe ubagiile ukwitika, fyosa fibagiile.”

106 Yoshua aalitike iki, palema nalinga Kyala afimibilisigwaga ukwimika ikisu ukuti kingasyungutilaga. Aakolelile ikyene pala na Maka gamo agangi, amaka Gake Mwene; ukuti ikisu kikaasyungutile ku sala malongo mabili na sina, mpaka Yoshua aaponjwile pamwene pa ndugu gwake. Umwene alyegile ifipata. Naloliloli, umwene abombile. Kyala gwabwanaloli bwila.

107 Lilino une ngwikyelaga linga uswe twaali na kabalilo ukwega abaponjoli bingipu, loli une ndinago amaminiti kalongo lilino. Keta, bosa apanjoli abapala aba, mumo abene baayilile, kangi babwite abakulumba balwitiko, abene bosa baafwile pa kipata kya bufwe. Abene bosa baapyutigwe, palapala pa kipata kya bufwe.

108 Polelo pala pisaga Uluyungu Ulwabunyafyale lwa Abrahamu. Abene baali mbeyu iyakupeligwa, ukufuma kwa Isaka. Loli apa lulinkwisa Uluyungu Ulwabunyafyale ulwa Abrahamu, uyu aali Kristi, Uluyungu lwa Abrahamu ugwa lwitiko; ifi uswe tubagile ukuya ikyo, keta itolo ukuti kali uswe tuli ikyo pamo tukaya. Imbeyu yakipeligwa yaali kyakwimilila itolo. Bosa ba abene bapapigwe mbupapigwe bwakipeligwa, loli Umwene isile mbupapigwe mundindwana. Muketile, ulu lukaali luyungu lwa Abrahamu, kokuti, un’Juda. Umwene aalisile mu mbeyu ya lwitiko ulwa lufingo. Kangi, polelo, uswe tubagile ukuya bana Bake, ukwisila mu Nnyambala uyu.

109 Ketesya isi Umwene aabombile. Bo Umwene ali pa kisu, Umwene aaponjwile nukupoka ikipata kilikyosa iki undugu alinakyo; Uluyungu Lwabunyafyale. Umwene afingile iki mu Lisyu. Umwene aaponjwile iki. Umwene aaponjwile ikipata kya bubine, kya uswe. Isyo syo aalisile ukubomba. Umwe, kumbukaga, bandu babine, Umwene aaponjwile ikipata

ikyoye. Ugwe utikufimbilisigwa ukukiponjola ikylene; Umwene aaponjwile ikylene. Abanyambala abangi bafimbilisigwaga ukuponjola ifipata fyabo bene. Loli ugwe utikufimbilisigwa ukuponjola; ikylene kitalile kiponjologwe. Umwene aaponjwile ifipata fya bubine. Kangi aabombile fiki Umwene bo Umwene aaponjwile ifipata fya bubine? Ikuyoba ukuti Umwene iku... Kilikosya iki ugwe kusuma pa kisu, kangi kilikyosa iki ugwe upinyile pa kisu, Umwene ikukipinyaga ikylene ku Mwanya, atupele uswe ifungulilo sya kipata.

¹¹⁰ Umwene aaponjwile ikipata kya ngelo, ni Lisyu. Kangi ifungulilo syaali, “Lwanaga nu ndugu, kangi umwene isakubopaga ukufuma kwa ugwe.” Umwene aaponjwile kyosa ikylene; aaponjwile ububine bulibosa.

¹¹¹ Umwene aaponjwile ubufwe, kangi Umwene aaponjwile gehena. Umwene aaponjwile ubufwe na gehena. Umwene aaponjwile ifi abangi baatologwe ukuponjola, panongwa yakuti abene baali mbeyu yakipeligwa. Iyi yo Luyungu lwamwambepo. Umwene aaponjwile ikipata kya lipumba, kangi asyukile ilisiku lwabutatu, ku busaligwe bwitu.

¹¹² “Kangi uswe tukindile abaponjoli.” Uswe tukwingila mulamula itolo, ukuya kilingo, “Ukukinda baponjoli.” Lilino uswe tukubomba nu ndugu umponjologwe. Ububine buponjologwe. Ubufwe buponjologwe. Gehena aponjologwe. Filifyosa fiponjologwe. O, mwe! Une angali nndi nywamu kabili ka bunywamu bwangu, lilino lumo une ngwipilika kanunu kabili kosa. Uswe tukulwana nu ndugu uyu aponjologwe.

¹¹³ Yo nongwa Paulo aabagile ukuyoba, bo abene bikuyenga ikubumba, ukubuuta untu gwake, umwene alinkuti, “O bufwe, kali kugu ukasufi kako? Mbonesya apa ugwe ubagile ukumbela une mbope pamo nguute. Lipumba, buli kugu ubuponjoli bwako, kangi ugwe kwinogona ugwe kummataga une mula? Une ngukusolelaga ilipumba limo ilisitakandu kula; kangi une ndi mwa Umwene, Umwene isakunsyusya une pi siku lyabumalikisyo.” Undugu umponjologwe!

¹¹⁴ Uluyungu Ulwabunyafyale ulwa Abrahamu! Lilino, imbeyu iyakipeligwa yaatologwe ukusosola ku Kila. Loli Uluyungu Ulwabunyafyale lubagile ukuponjola, lutalile luponjwile, kabuno Umwene abukile pankyeni pa uswe kangi aaponjolile uswe ikipata kilikyosa. Umwene yo lilino, bo finkindile ifyinja maelifu mabili, Umwene ikwima nkati mmyitu, Umponjoli gwamaka. Umwene akaaponjwile ububine bwenemma... Umwene aaponjwile ububine. Umwene aaponjwile ingelo. Umwene aaponjwile undugu aligwesa. Umwene aaponjwile ubufwe. Umwene aaponjwile gehena. Umwene aaponjwile ilipumba, kangi asyukile kangi. Kangi ifyinja maelifu mabili ukukinda, apa Umwene ikwima pakati pitu, pamusi apa, ukwimanyisya Mwene, Mponjoli gwamaka! Ameni. Umwene akali ali apa, mumi, ukusisimikisya ulufingo Lwake, Uluyungu

Ulwabunyafyale lwa Abrahamu! O, mwe! Kangi undugu isaku. . .

¹¹⁵ “Umwene isakupokaga ifipata ifya ndugu gwake.” Kwa abo, Luyungu, Umwene ikwima apa mumi ukwisisimikisya Mwene kwa ywani? Ku sila Imbeyu simanyigwenganila isi sibagile ukukiketa ikylene. Umwene aaponjwile ikyo. Yuyo, ukufuma pa lugelo lwake, ulwa lufingo lwa Lisyu, abene baamyatikiligwe na Mbepo Mwikemo, mu Mbili gwa Kristi, ku bene asisimikisye (fiki?) Abahiburi 13:8 ukuya yuyo. Abene baamyatiligwe mula na Mbepo Mwikemo, u Mbepo Mwikemo yula uyu aalisiile mu. . . Abrahamu aaketilengani ikylene; ukwisila mu lwitiko umwene aalitike ikylene. Kangi lilino uswe tukwambilila Umwene, ukuketa kubutasi ku lufingo ulwa ifi Umwene aayobile. Kangi Yohani 14:12 asisimikisigwe mmasiku ga bumalikisyo aga, ukwisila mwa Mponjoli nsyuke, Mwene.

¹¹⁶ Somma akabugutula kamo; loli u Mundu, Kristi, u Mponjoli. Komma ikipanga kyangu, komma ikipanga kyangu ikya Baptisti, pamo u Presbeteri gwako, Methodisti, pamo aba Pentekosto, komma ukwisila umo; loli ukwisila mwa Yeso Kristi. Umwene mumi umwisyugu. Umwene aasyukile ukukitola ikyo, ku busaligwe bwitu.

¹¹⁷ Kangi panongwa yakuti Umwene mumi, Umwene atile uswe tulibumi nuswe. “Umundu atikuya mumi nu mkati gwene umma, loli ni Lisyu lyosa,” komma akayabo ka Lisyu, “i Lisyu lililyosa ili likusoka pa kanwa pa Kyala.” “Une ne Busyuko nu Bumi. Umwene uyu ikwitika mwa Une, palema nalinga aafwile, pope isakuyaga mumi umwene. Aligwesa uyu ikuyamumi nu kwitika mwa Une atisakufwamo siku. Mukwitika umwe iki?” Ega ikipata kya ndugu aligwesa!

¹¹⁸ Ngimba umwene aaponjolaga bulebule Bosworth napapo Kyala. . . Bosworth aali mwa Mponjoli. Kangi iyo yo nongwa umwene atile, “Isala insangalufu ukukinda iya bumi bwangu yo lilino ulu.” A-ha. Umwene aalimmenye u Mponjoli Gwamaka yula. Ukusisimikisya kwake kwaaligemekisye pa Mwene. O, mwe! Lilino uswe tubagile ukwimba:

Ukuyamumi, Alinganile une; ukufwa,
Alimbokile une;
Ukusyiligwa, Aapimbile imbibi syangu
kubutali;
Ukusyuka, Alinsalile kisita ntengo syepwa:
Ilisikulimo Ikwisa, O ilisiku ilyaalwimiko!

¹¹⁹ Ku bene aba bikwiketa ukuya baponjologwe. Eddie Perronet, une ngusubila umwene aali, umwene aatoligwe ukuulisya isumo syake isya Kikristi. Nayumo asilondaga isyene. Abene baakali nakyo nakimo ikyakubomba nasyo. O, mponjologwe, loli mwitiki! Ilisiku limo, u Mbepo Mwikemo alisile pa mwene. Ikipata kya ndugu, uyu akalondaga ukwambilila ubusimbeshimbe bwake! U Mbepo alinkunkoma umwene, kangi

umwene alinkukola ikyakusimbila, Kyala alinkumwitikisya asimbe ulusumo ulufumuke.

Mwesa tufy'Ingamu ya Yeso!
 Unko Abandumi bagwe pasi;
 Twala panja ingiya yabunyafyale,
 Kangi mfwike Umwene Ntwa gwa bosa.

¹²⁰ Umfwamaso Fanny Crosby, akabalilo kamo. Atile, "Ikyene kikusanusya fiki kwa ugwe?" Bamo...Umwene akaagulisye ubwabuke bwa kupapigwa kwake bo Elvis Presley Ugwikipentekosto aabombile, pamo bo yu Boone gwakipanga-kya-Kristi aabombile, pamo bo yu Red Foley aabombile, ukulisya ubumang'anyi bwabo nkisupanja. abene balinalo ulukindi lya ma Cadillac, kangi amadola-elifu-elifu, amarekodi ga golidi. Loli Fanny Crosby aalimile nsubiligwa pa buyo bwake. Umwene alinkulalata:

Ungangilania une mma, O Mpoki mololo,
 Pilika ukukuta ukuyuyuligwe kwangu;
 Bo Ugwe kukolela pa bangi,
 Komma ukungilania.

Ugwe gwe Kisoko kya bukibe bwangu,
 Ukukinda bumi kwa une,
 Uyungi ywani pa kisu ukukinda Ugwe?
 Pamo ywani Kumwanya loli Yuyugwe?

¹²¹ Abene batile, "Kwakutigi fiki linga ugwe ulimfwamso bo ugwe kufika Kumwanya?"

Umwene atile, "Une ngwakumwanya Umwene mulimosa."

Baatile, "Ugwe kwakumnyama Umwene bulebulu?"

Aatile, "Une ngwisakumwanya Umwene."

Baatile, "Nka. Crosby, ugwe ubagile ukukaba amadola maelifuelifu."

Umwene aatile, "Une ndikugalonda amadola elifuelifu."

¹²² "Ugwe kwisakumwanya Umwene bulebulu?" Umwene aatile:

Une ngwisakumwanya Umwene, Une
 ngwisakumwanya Umwene,
 Bo ndabuligwe pa lubafu Lwake une
 ngwisakwima;
 Une ngisamumwanya Umwene, Une
 ngwisakumwanya Umwene.

¹²³ "Linga une ngutoligwa ukunketa Umwene, une ngwisakupalamasya ku fikoko fya misumali mmaboko Gake." Umwene aaponjwile ikipata kya ndugu gwake. Ena.

¹²⁴ Linga ugwe uli mwa Kristi! Umwene aatile, "Linga ugwe kwitugasya mwa Une, kangi imbombo Syangu sikwitugasya mwa ugwe; suma ifungulilo isi ugwe kulonda, suma kyo

kipatanki iki ugwe kulonda ukupoka; suma iki ugwe kulonda, kang'i ikyene kisapigwa kwa ugwe. Linga ugwe kwitugasya mwa Une, kang'i i Lisyu Lyangu likwitugasya mwa ugwe, ugwe ubagile ukupoka ikipata ikyandugu kilikyosa iki kikwisa pankyeni pako." Ugwe gwe Luyungu ulwabunyafyale lwa Abrahamu.

¹²⁵ Kyo kipatanki iki kimile pankyeni pako? Linga ikyene bubine, ugwe ukindle umponjoli pa ikyo. Polelo tubagile ukuyoba, ukwimba ulusumo ulukulu ulwaipyana ulu:

Ulufingo losa mwa Buku lwangu,
 Imitu gyosa, amanandi gosa...kangi
 Lwakyala fiyo,
 Une ngusubila mu lugano Lwakyala Lwake,
 Kabuno ulufingo losa mwa Buku lwangu.

¹²⁶ Uswe tukindle u mponjoli, kang'i Uluyungu lwa Abrahamu lwisa kupoka ikipata kwa ndugu! Bo abene bikuyoba Ifindu ifi fikabagila ukuboneka, bo abene bikulonda ukukikolela Ikyene kya setano, pamo Bezebabu, pamo ikindikimo ikingi, Kyala asisimikisye ukuponjola ikipata kilikyosa nu kwegu undugu.

Unko twipute.

¹²⁷ Gwentwa, kuliyaga ukuti Uluyungu lwa Abrahamu... Une mmenye abene bakukibonaga Iki, Gwentwa. Ilisyu lila likugwaga bulebu kisata kutika Umfu ugwabwanaloli? Une ngwiputa ukuti abene bikupilikisya lilino. Umundu aligwesa uyu ikwisa ndukindi lwa lwiputo alibumbulusigwaga.

¹²⁸ Gwentwa, linga balipo bamo muno bakaali, aba bakaali nu mwisyugu bakatendeka ululato lwabo, bakiima mma pabandu nukwimila Kristi, bitendekisye ukukana ifimanyisyo ni findu ifitalale, ifikafukafu, ififwano ifi fibasosisyeko abene kwa Ugwe. Kang'i abene balimililaga lilino, nukuyoba, "Une ngumwitikaga Umwene ukuya Mpoki gwangu." Polelo Ugwe gwisakubimililaga abene pi Siku lila.

¹²⁹ Bo uswe tukwinamisya imitu gitu, linga balipo abo bikulonda ukwima pa kabalilo kanini itolo, kulwiputo, ukuyoba, "Une ngulonda ukummwimila Umwene lilino, ukuti Umwene akanyimile une pi Siku lila, mu Kuyapo Kwake Ukwabunyakyala." Une ngukulalusya ugwe, nukukupu ugwe ulusako ukuti ingamu yako yibikigwe mwa Buku gwa Bumi, linga ugwe kwima. Une ndikukusuma ukwingila ikipanga kilikyosa. Une ngukusuma ukwisa kwa Kristi, linga ugwe uli apa kang'i ugwe utammanya Umwene.

¹³⁰ Kyala akusaye ugwe, ndumiana. Alipo uyungi, atigi, "Une—une ngulonda ukwima lilino." Kyala akusaye ugwe, nkikulu. Kyala akusaye ugwe, kalumbu gwangu. "Une ngulonda..." Kyala akusaye ugwe. Kyala akusaye ugwe. "Une ngwega ubwimililo bwangu, pamusi apa." Abandu abanunu aba,

banyambala na bakikulu, bimilile mmwanya, “Une ngwegaga ubwimililo bwangu, pamusi apa.”

¹³¹ Kangi ilisiku lila bo dokotala ikuti, “Ena, kibwangatuke; ililopa lyake likoneka, ubufwe buli pa mwene, pamo pa umwene.” Pamo, ulubunju lumo, ugwe kwisakukumbukila ubwimilio bwako. Ugwe imila Umwene lilino.

¹³² “Linga ugwe uli ni soni na Une pamaso ga bandu, une ngwisakuyaga gwa soni pamaso pa Tata gwangu na Bandumi abikemo. Loli linga ugwe kunfumusya Une pamaso pa mundu, umwene nine ngwisa kunfumusya pankyeni pa Tata Gwangu na Bandumi abikemo.”

¹³³ Kyala akusaye ugwe, kalumbu gwangu. Babagile ukuyapo bamo mmwanya umo pabuyobumo? Lilino ulu, bo uswe tukugulila. Bamo mwa bene, ukongelapo pasi apa? Silikanunu syosa. Une ngukwega ugwe pa lisyu lyako, mwinangu.

¹³⁴ Linga i Lisyu likugwa pa Mfu ugwambolela, bo yu nkikulu unnini pa kisiba, umwene—umwene aapilikisye. Umwene alyimiligwe Kumwanya, ukufuma ku lwalo...bo ikisu kikaaligwa. Akabalilo kako Ulumuli lula lukomege Ilyene, umwene alikulyagania Ilyene.

¹³⁵ Kyala akusaye, nkundwe. Uyu yo nkifu...Kyala akusaye ugwe, nkundwe gwangu. Ugwe ubagile ukuti ubombile ifindu ifikulumba mbumi bwako; ugwe kubomba ikindu ikikulumba iki ugwe ukabomba siku, imila Kristi.

¹³⁶ Tata gwitu Gwakumwanya, imbeyu yigwile pa mfu, pamusi apa. Uswe tukuketa Ubumi bukunyibukila mmwanya. Abanyambala na bakikulu bimile pa malundi gabo, kangi ikisige ikiketa-mosa ikya Kyala, Uyu yo mwagigwapaliposa, mmanyafyosa, gwamakagosa, kikubabona abene. Abene bo Bako, Tata. Une ngubatwala abene kwa Ugwe lilino, ukuya fyombo.

¹³⁷ Ngusuma ubwendelemo ubu ubwa bene bimile apa lilino, umenye ifi abene babombile, ukumanya ukuti iki kikusanusya fiki, ukuti abene bikwima ukwega ubwimilo bwabo na baywelufu abanandi aba Ntwa. Baliyaga abene bwila bikaale babwanaloli mpaka pi Siku ili abene bimege mu Kuyapo Kyako, polelo Ilisyu ilyalugano lila lisakuyoba, “Ena, ilisiku limo mu Baton Rouge, pamo ubuyo ubunini ubukoleligwe Denham Springs, umwene aalinyimile Une, Tata, lilino Une ngumwimilaga umwene, pamo umwene.” Tupaga iki, Gwentwa. Abene Bako, mu Ngamu ya Yeso. Ameni.

Kyala abasaye umwe, panongwa ya bwimilo bwino. Kyala bwila...

¹³⁸ Lilino mbombela une ikindu kimo iki. Londesya, linga ugwe uli kifuki papo abatimi aba balipo, agana na banandi, yoba nabo. Linga ugwe ukosigwa mma mpaka na lino, mu losyo lwa Kikristi,

bomba lululo. Itwalaga gwimwene pakati pa bitiki lilino, abitiki ababwanaloli, komma abipela-bitiki; abitiki ababwanaloli.

Bo uswe tukwiputa, unko twiputile utufunga utu.

139 Tata Gwakumwanya, utufunga utu tukubuka panja lilino; kuko, une ngamanya. Lumo tata yumo unkangale umfwamaso ikele panja pala nkatubwi akanini kubuyobumo, ikugulila akafunga aka ukwisa; akana akanandi kalambalele pala pa kitala kya kukipatala; u yuba imile pala, nulutende, ikugilila ukugomokela kwa kifunga. Tata Gwakumwanya, une ngusuma ukuti Ugwe kubukaga nifyene. Kangi panongwa ya kimanyilo kya Kuyapo Kwako umwisyugu, nulwitiko lwitu mwa Ugwe bo uswe tulumbilile Ilisyu Lyako, kuliyaga ukuti ulwitiko ulu lwali mwa Abrahamu, nulwitiko ulu lwatendekigwe nukupigwa kwa uswe nu Yeso Kristi, lulibukaga ni fifunga ifi nukubumbulusya aligwesa uyu ikyene kikubikigwaapo. Uswe tukutuma ifyene, mu Ngamu ya Yeso. Ameni.

140 Lilino itolo pakabalilo, bo tukukolela ulukindi lwa lwiputo. Ugwamakagosa kangi gwamaka Kyala, Umwene unkulumba, Umwene umfwanikisye-mosa. . . Ngusuma, binangu, une—une ngwanda pakwiputula ababine, kangi une. . . Lumo, bo uswe tukwikilila, une—une mbagile ukusita kuyoba kimo kwa ugwe; bamo mwa umwe mubagile ukubukaga bo akabalilo kala kakafwana. Kali gwe ywani, linga ugwe ukaliimile nu kwima mma, pitasipo, kangi ugwe ukuyaga gwakusisimikisya. . .

141 Linga ugwe uli gwakipanga ku kipanga kimo, ikyo kyo kindu kinunu, loli ikyo kikaya kikafwanikisya kanunu mma. Muketile, undagili unnini unkabi aali gwakipanga ku kipanga. Muketile? Umwene alinkundalusya Yeso iki umwene aabagile ukubomba ukuya nu Bumi bwa Bwilanabwila. Umwene akalitike Ikyene siku. Umwene aasokilepo. Ikyo kyo butoyofu buki ku ndumiana uyu ukubomba. Komma ukwega ubuyo bwake. Umwe mukukumbuka akabalilo kabumalikisyo apa umwene abonesigwe? Ukufuma apo, umwene akabile. Umwene alyongelilepo ubukabi. Umwene afikile pa buyo mpaka syope indamba syake syapundaga. Loli lelo uswe tukwaga ukubonesigwa kwake ukwabumalikisyo, mu gehena, indapi sikunsukulisya. Komma, komma ukwitikisya ikyo kibonekege kwa ugwe. Mwitika Kristi.

142 Umwe mwe banyela, umwe balindwana, balumiana, itolo pa kusanuka kwa bumi, ngusuma bomba ikyo. Mbilika une, ukuya—ukuya nkundwe, gwinu, yumo uyu abaganile umwe. Une ndi apa panongwa yakuti mbaganile umwe. Une nunganile Kyala, kangi une mbaganile umwe, kangi une ngabagila ukungana Kyala linga une ngabagana umwe.

143 Une mbagile fiyopu, linga ugwe gwaali nako ikakuyobapo akakubika, ugwe bika ikyene pa mwanangu panja apo, pamo yumo gwa bana bangu. Unko une itolo. . . Une, une ngubukaga kisita ikyene. Umpapi aligwesa ikubombaga ikyo; yope Kyala

lulo. Muketile? Baganaga abandu Bake. Gananaga yumo kunnine.

¹⁴⁴ Ugwe kuyoba, “Fiki ugwe kubakemela abene?” Ulugano ulwabwanaloli lo lugolosyi.

¹⁴⁵ Linga umwanako itugesye panja pa lukindi; ugwe kuti, “Ena, pala itugesye Mwanitu. Umwene akagwakukibomba ikyo umma, loli une ndikulonda ukufulasya ubwipilike bwake.” Ugwe ukangana umwene mma. Umwene ikugogigwaga pala. Linga ugwe unganile umwene, ugwe kuntwala umwene nkati nukumpa umwene ukukomigwa. Ugwe kwisakumpelaga umwene apilikilege.

¹⁴⁶ Iyo yo njila iyi Kyala ikubombela. Ulugano lugolosyi, kangu ulu lo lugano lwabwanaloli.

¹⁴⁷ Akabalilo kako undumbilili ikwima nukubitikisya umwe bakikulu ukutumula inywili, nukwipaka ilangi ni findu, nukusita kubagolosya umwe, lukayapo ulugano ulwabwanaloli apo; kangu atisakuyoba pabwelu. Kangu ikubitikisya umwe banyambala ukwega katatu pamo kana, ni findu fyosa ifi, nukukileka itolo ikylene, lukayapo ulugano lwabwanaloli apo. Ikubitikisya ikwingila nkipanga, nukubapuputa umwe pa nyuma, nukubafondeka umwe nikimanyisyo kimo, ayobege, “Ikyo kyo kyene umwe kufimbilisigwa ukubomba, ko kwingila nkipanga ikikemo,” lukayapo ulugano apo. Pamo, lumo, unnyambala uyu nsobi kubumalikisyo, mwene, umwene atikuketa umma.

¹⁴⁸ Ulugano ulwabwanaloli lo lugolosyi, kangu lukugomokesya ugwe ku Lisyu Iya Kyala.

¹⁴⁹ Keta Yeso, mumo, iki Umwene aayobile, panongwa yakuti Umwene abaganile abene, fiyo mpaka Umwene aafwile mbuyo bwabo, akabalilo kako abene napapo bakooelaga ku Lilopa Lyake.

¹⁵⁰ Lilino u Mbepo Mwikemo unkulumba ali. . . Une ngulonda ukugulila ku miniti yimo itolo. Une ngugulila mpaka ubonelele bwa Mbepo Mwikemo bufike pa une, bo tukali ukwandako. Une nalumbililaga. Ndaga umwe, panongwa ya kwitikisania kwinu.

¹⁵¹ Lilino, aligwesa nkati muno, kulikosa kuno muliko, kulikosa nyumba iyi, iputa itolo pa miniti itolo, yoba, “Gwentwa Yeso, ndula une! Ndula une! Unko ngole ikyakufwala Kyako.” Yeso aatile, umwe mumenye, akabalilo kako unkikulu apalamasyege unselekesye Gwake, Umwene aakalipilike ikylene, mumbili, loli Umwene alinkusanuka nukumanya uyu umwene aali na ifi umwene aabombile. Umwene yo yulayula Yeso pamusi apa, u Mputi Unkulumba abagile ukupalamasigwa nu kwipilika kwa bonywa bwitu.

¹⁵² Umwe mukwitika, aligwea gwa umwe lilino, ukuti ikyo kyabwanaloli, ukuti u Kyala uyu atendike ulufingo ulu, kamokene kangu (kangu Umwene alibonesya ikylene) ukuti

tukwitugasya mmasiku ga Sodomu? Balinga bakwitika ikyo, nkati mu nyumba iyi, fyusya ikiboko kyako itolo.

¹⁵³ Uswe tuli nubumi, mo syayilile, mu Sodomu. Ikibugutila kyosa kibwapuligwe, ikibugutila kya kisu kyosa, kilikyosa, ikibugutila kya kipanga, ikibugutila kya ndyali. Kakayapo nakamo. Indyali yo yibolile fiyo. Ifibugutila, kulikosa, abalagili bitu, ikyene kyosa kibolile. Ikipanga kibukile injila yilayila. Ifikolo fyaya mulala. Ubwene itolo bubolano, Sodomu!

¹⁵⁴ Polelo, kumbukilaga, Kyala alinakyo ikyo pankyeni pa ugwe, lelo kumbukilaga Umwene aayobile ukuti Umwene isakwiyimilaga Mwene mu mbili gwa bundu, kangi isakubombaga mumo Umwene aabombile pankyeni pa Sodomu, bo Mwanundumiana umfingigwe bo akaboneka pa buyo. Umwene aafingile ukutuma yumo uyu ikwisaga pa nkyeni pa Mwanundumiana umfingigwe yula, mumo Umwene aabombile kubuyo bwakubwandilo, uyu ikuyobagelaga; kangi Umwene aatile, “Akabalilo kako u Mwanundumiana gwa mundu ikusetuligwa.”

¹⁵⁵ Une ngakumanya ugwe umma. Ena, Miss Thompson, ulutamyo lwabukikulu bula ni fyakutamya, ugwe kwitika ukuti Kyala ikukupelaga ugwe uyege kanunu? Ubagile ukwitika ikyene? Ugwe kwitikaga? Miss, Miss Thomas, ugwe kwitika Umwene ikukupelaga ugwe uyege kanunu? Fyusya amaboko gako, lelo.

¹⁵⁶ Alipo unkikulu itugesye panyuma yako itolo. Umwene ikwiputa. Umwene ani mbungo ya fifupa.

¹⁵⁷ Uyu itugesye kifuki nayo umwene, yo lutamyo munda, ikwiputa yope. Ugwe kuyapakukitaga ikyene, ugwe utikuketesya. Umwe mukaya ba kuno umma. Umwe mufumile ku Mississippi. Umwe mwe Tat. na Mam. Stringer. Linga umwe mukwitika ni ndumbula yosa, Yeso Kristi isakubabumbulusyaga umwe. Linga umwe mubagile ukwitika ikyene. Mukwitika umwe? Polelo umwe mubagile ukwambilila ikyene. Ndaga. Fyusya ifiboko fyinu ukuti abandu bakete ukuti yo umwe.

¹⁵⁸ Une ngabamanya abandu bala. Une ngababonamo siku, mbumi bangu. Ugwe kufimbilisigwa ukwitika, mwinangu. Umwene ikwibonesya Mwene. Ngimba umwe mukwitika ikyo, ni ndumbula yinu yosa?

¹⁵⁹ Fiki ugwe, nkulumba, kusenyenda untu gwako kangi kuketa ku myangu bo ulo? Ena, nkulumba. Panongwa yakuti ubombile ikyo, une nguyobaga nanugwe pakabalilo kanandi. Ugwe kufwana yogwe nnyambala nkangale gwitugesye papapa apa, kungeka une. Umwene angetile une, nubwanaloli fiyo. Umwene iitike ikyene. Ugwe kummwiputula umundu uyungi uyu aali ni ndumbula. Loli—loli ikinywamu fiyo ugwe kwiputa, ugwe kulonda, ugwe kulondalonda ulosyo lwa Mbepo Mwikemo. Uko kotalusya. A-ha. Uko kotalusya. Linga ugwe kwitika iki!

Unkikulu uyu, ugwe kulondesya imbombo. Palubafu paifyo, ukuti umanye ukuti une ndi nsololi gwa Kyala, pamo ntumigwa, ugwe upanjigwemo kabili kosa. Ukwene kukulekile ugwe ukufwana ukuya monywa. Uluko losa lwa bubine, indamyo syamwambepo. Une ngulonda ukukubula ugwe ifyene fyosa fitabateme. Ulwitiko lwako lukubumbulwisye ugwe.

¹⁶⁰ [Ubuyo busitakandu pa tepi—Nsimbi.]...ikele palapala kifuki na ugwe. Umwene ikwiputa. Keta kuno. Umwene akupilike ugwe, kangi ugwe umpalamasisye Umwene. Ngakumanya ugwe, loli Umwene akumenye. Une ngubulaga ugwe ifi ugwe gwiputilaga. Ugwe kwitika ni ndumbula yako yosa? Ugwe uli nulutamyo lwa kayongo, ugwe kwiputa. Ngimba kwitika ukuti Kyala ikukubumbulussyaga ugwe nukukupela ugwe ukuya kanunu? Ugwe gwe Nkas. gwa Smith. Uko ko kutalusya. Fyusya ikiboko kyako.

¹⁶¹ Muketile, Umwene ikwibonesya Mwene. Ikyene kyo fiki? Ulwene lo Luyungu lwa Abrahamu, ulwitiko ulu Abrahamu aali nalo, Ntwa Yeso Kristi pakati pitu, ikusisimikisya i Lisyu Lyake, ni fika fikukonga.

¹⁶² Aliku, makadi malinga aga gikwiputililaga, fyusya amaboko ginu, uli ni kadi? O, uswe kinunu twandeko ulukindi lwa lwiputo.

¹⁶³ Umwe muketile, umwe mukusyagania bule? Lilino umbepo yula komma itolo...Ikyo kitikubumbulussy mma. Ikyo kikubonesya itolo ukuti Umwene ali apa. Abatimi binu bali nu bulagili bulabula ukwiputila ababine. Abene batikubomba ikyo umma; umma, naloliloli umma. Loli abene—loli abene itolo bulabula ubulagili, “Ifimanyilo ifi fisakubakongaga abitiki.”

¹⁶⁴ Lilino une ngulonda abatimi binangu kuno. (Ngimba ikyene kili kanunu, ukukolela ukufuma kukilundilo...?. . .)

¹⁶⁵ Balinga batimi apa aba bikwitika ni ndumbula yinu, abalumbilili muno, bikwitika? O, ndaga umwe. Une nguswiga mubagile ukwima? Isaga kuno, ima nanine pa miniti, papapa pasi apa, iputila ababine. Isaga papapa pasi apa. Lilino ugwe ketesya ububumbulussyi bukuboneka, ketesya iki kikubonekaga.

¹⁶⁶ Une ngulonda umwe mwise, tendeka i—i ngindi ibili papapa apa. Une ngwisa pasi apo lululu ulu, ukwiputila ababine. Une ngulonda abatimi aba bikwitika aba bikulonda ukwibonesya bene ukuya bitiki, ukuti ugwe kwitika, ukuti ugwe kwisa kuno, ugwe kwitugasya ubumi bwikemo, ubwifusi. Kumbukaga, keta kuno iki kikusooka, ukwimilila Inongwainnu ya Kristi!

¹⁶⁷ Nkundwe Blair, une mmenye ugwe ulipo, ugwe pamo Nkundwe Pat. Ngimba umwe mubagile ukutendeka ingindi ibili mumo umwe mukubombela bwila, linga umwe mubagile, ugwe nu Nkundwe Pat.

¹⁶⁸ Batimi ababikwitika aba bikwitikaga! Lilino, keta, linga Kyala fiyo abagile ukwibonesya Mwene ukwisila mu Lisyu

Lyake, ni Lisyu Lyake, balinga bamenye ukuti i Libangeli, Yeso ayobile isi, “Ifimanyilo ifi fisakukongaga abene aba bikwitika. Linga abene bikubika amaboko gabo pa babine, abene bisakubumbulukaga”? Batimi, umwe mwisile apa ukwibonesya mwibene ukuya bitiki. Ngimba momumo? Umwe mwe bitiki (momumo ngimba?), umwe angali mukima apo umma. Lilino ngimba Yeso ayobile fiki? “Ifimanyilo ifi fisakukongaga abene aba bikwitika.” Une ne mwitiki palikimo na umwe.

¹⁶⁹ Une ngusuluka pasi apo. Aba bo bandu bitu, kangi uswe twe batimi pa mitimo igi. Une ngusuluka pasi ukwelesya ikilepa kyangu na numwe lilino, ukubika amaboko gangu na ginu. Kangi akabalilo kako abandu bikwisaga, linga umwe muli na kalikosa aka itolo kakwilamwa kanini minogono ginu, sosya akene lilino ulu; ukuti akabalilo kako abandu bikwisa, polelo yumo mwa bene bikwisa, kangi uswe tukubika amaboko pa bene, abene bikubumbulukaga. Ngimba umwe mukwitikaga ni ndumbula yinu yosa lilino, aligwesa?

¹⁷⁰ Balinga muno bikwiputilaga abangi mumo abene bikukinda, fyusa ikiboko kyako, “Une ngwiputaga.”

¹⁷¹ Kumbukaga, lumo yo baba gwako, yuba gwako, umwanakundwana pamo mwanakundumiana, kalumbu pamo nkundwe. Kangi linga umwene aka yo uyo, yo munduyumo, uyu ikwisaga ukukilania ulukindi ulu. Kangi bule linga baali bene, kangi abene baafwaga na kansa, pamo imbungo yimo innyali, ngimba ugwe utikulondaga abandu bayege babwanalolindumbula? Naloliloli, uswe tukulonda.

¹⁷² Lilino, une ngwitika, umwe mukubombaga bulebule... Lilino aba mulukindi *ulu*, unkolofwa ugu, ima ukukinda ulubafu *ulo*, ni kadi lya lwiputo. Ima ukukinda ulubafu lula, mwesa mwe muli ikiyabo kya kukilyelo. Lilino, injila, gulila kiyabo kya kukimama; uswe twesa tukulundikanaga, umwe muketile, kangi umwe mutikumanya bulebule, ifi uswe tukubomba. Silikanunu, mwesa mwe muli nkiyabo *iki*, imilila *apa*. Lilino, bosa aba bali kiyabo kya kiboko-ikililo, isaga itolo injila iyi, panongwa yakuti umwe mukwisaga pasi, ukwisa ukusyungutila.

¹⁷³ Kangi mumo umwe mukubukilaga, mumo abene bikusokelaga, Nkundwe Borders? Palapala pa kifigo kypalubafu, ukwisa palapala ukusyungutila kangi ukwingila mu nyumba kangi.

¹⁷⁴ Polelo, akabalilo kako ulubafu *ulu* lukukoleligwaga, mu maminiti manandi, kangi abene bikwimililaga. Kangi unko tukete lilino iki... Ena, aba ba kiyabo *iki*, sanukila ku lubafu ukukinda apa. Kolelelaga ku kadi yako, kilaniaga ku lubafu ulu. Kangi umwe mmwanya umo, enda kunokuno pasi ukwagana nabo kubumalikisyo bwa fikota kula. Lilino aba mu kiyabo kya kioboko-kimama, buka ukukilania ku lubafu lwa kiboko-kimama. Kangi lelo, umwe muketile, umwe tendeka ulukindi lwinu kangi gomokelaga injila *iyoy*; syungutilaga injila *iyoy*.

Muketile? Kangi umwe mukukongaga ulukindi ukusyungutula palapala, polelo uswe tutikonganikaga umma.

¹⁷⁵ Kangi polelo umwe mmwanya umo, tendeka itolo ubuyo bwinu mulamula mu ngindi, kangi nukusuluka itolo mula bo abene bikwisa ukukinda.

¹⁷⁶ Lilino, lilino andako itolo ukwenda ukugomokela, aligwesa gwaumwe, endaga itolo ukugomokela mpaka umwe mukwagana nu lukindi papapa ukusyungutula *apa*. Isaga itolo ukusyungutula, ikusyuka muno *apa*, andako itolo ukwenda ukusyungutula kangi isaga ku lukindi ulu papapa *apa*.

¹⁷⁷ O, ngimba fiki fibagile ukuboneka lilino ulu! Fiki fibagile ukuboneka! Aka ko kabalilo aka ikindukimo kikufimbilisigwa ukuboneka. Silikanunu.

¹⁷⁸ Lilino, isyo kotalusya, buka itolo ukugomokela usyungutula injila *iyu*, kangi ingila mu lukindi, bo ulu. Buka itolo ukusyungutula ulukindi ulu. Iyo yo njila lilino.

¹⁷⁹ Kangi lilino akabalilo kako umwe mwimile, aligwesa pa malundi gabo, uswe tukupaga ilisyu lya lwiputo. Kangi ikilundilo kikwiputaga nanine, ukuti umwe mukutendekigwaga ukuya kanunu. Yaga itolo nu lwitiko. Kangi komma . . .

¹⁸⁰ Isaga itolo ukusyungutula, ukubuka itolo kunyuma, isaga itolo ukusyungutula nukwingila nu lukindi ulu kunyuma apa. Isaga itolo ukusyungutula, ukutendeka ulukindi lumu ulunywamu. Isaga itolo ukusyungutula injila *yila*, kangi mutendeke ulukindi lumu. Apo po loli.

¹⁸¹ Aligwesa yaga ndwiputo. Yaga naloliloli ndwitiko lilino. Komma ukuketesya ikilundilo itolo lilino. Kumbukaga, uswe tu—uswe tusyungutiligwe nu Kuyapo kwa Yeso Kristi, ikutusubila uswe ukuyindika ifi Umwene abombile kuli uswe, ukwisila mukuya nu lwitiko mu Lisyu Lyake.

¹⁸² Ikyo kyo kinunu. Lilino ikyene kikuyaga kinunu itolo. Une ngwinogona ulukindi lula lukwingila kanunu itolo.

¹⁸³ Lilino bo abene bosa bimile, une ngulonda umundu aligwesa, mu nyumba iyi, ukwinamisya imitu gyinu.

¹⁸⁴ Gwentwa Yeso, ikyene kikubonekaga lululu ulu. Ulutumulo lukufimbilisigwa ukutendekigwa lululu ulu. Ngimba uswe tukwitika ukuti Ugwe uli apa? Ngimba uswe tukuganile ugwe? Tunulwitiko uswe, Gwentwa, ulwakufwanikisya ifi uswe tukusumaga? Abandu aba bikwibonesya bene mukwisila ukwima ndukindi. Gwentwa, kilingayaga ikyene paitolo. Kiyeye ikyene, Gwentwa, ukuti abene bakindege apa, aligwesa gwa bene bikukindaga apa kifwene abene bikukinda pasi pa Kristi, kabuno uswe tumenye Umwene ali apa. Kangi uswe tukusuma ukuti abene bikwambililaga ububumbulusyi bwabo. Une nsisimikisye ukuti mope mmilungu ni milungu igi gikwisa, abandu aba bikubukaga ku batimi babo, abakikulu aba baali

nu lutamyo lwa bukikulu, lutamyo lwa munda, abanyambala kansa gwa kisene, uluko losa ulwa ndamyo, bikuyaga kanunu, bayobege, “Umwe mumenye, ikindu kila kindekile itolo une,” kabuno abene bali mu Kuyapa Kwako. Bali isaga ukukinda lilino kangí—kangí sosya iki kikyo Ugwe gwafwiilile. Abene lo Luyungu lwa Abrahamu, kangí Ugwe ubaponjolile abene. Bali isaga abene nukwambilila iki Ugwe ubapele abene.

¹⁸⁵ Kangi, Setano, ugwe uyweluligwe fiyo undungu ugu, mpaka ugwe umenye ugwe ukuti ugwe gwe kindu ikiponjoligwe. Yeso Kristi akuponjwile ugwe pa Kalvari. Umwene aasyukile pisiku lwabutatu, ukuti tusaligwe, kangí Umwene imile pakati pitu lilino. Kangi ulwitiko lwitu lukuketa ku Mwene, kangí ukusokako kwa ugwe pamo kalikosa aka ugwe ubombile. Sokamo mbandu aba, mu Ngamu ya Yeso Kristi.


¹⁸⁶ [Buyo busitakandu pa tepi—Nsimbi.]...?..Uswe tubombile itolo mumo u Mmanyisi atulagile uswe tubombege. Balinga ba umwe mwe mukindile ulukindi lula, mwitike ukuti umwe mukuyaga kanunu, fyusya ikiboko kyako. Une nine ikyangu na yumwe.

¹⁸⁷ Ifi uswe twabombaga pala, kubumalikisyo, ukuya kabugutila ka balumbilili pala; bingi ba abene baali babine, une namenye ikyene, loli abene bikugela ukufyusya ukugela kwabo ukwingisya imitimo gyabo mula, kali bikwingila mula pamo umma. Abo bo batimi babwanaloli. Kangi u Mbepo Mwakemo aayobile kwa une, “Bapela abene bakolane amaboko palikimo.” Uswe twalukile indumbula syitu ni filepa palikimo, ni nyiputo, palikimo.

¹⁸⁸ Yeso, bapelaga abene bayege kanunu, bope. Kangi bapelaga abene ukuya batimi bamaka, bamaka mu Lisyu lwa Ntwa.

¹⁸⁹ Kyala ayege, bakundwe bangu, Umwene alibapaga umwe fyosa ifyakunyonywa fya ndumbula syinu. Umwe mulimbombelaga Umwene amasiku gosa, kangí yaga na maka ga Kyala mbumi bwinu, ukulumbilila ku kabugutila kanunu ka bandu aba. Ngusuma Yeso Kristi, Uyu aali nanuswe, kangí ali nanumwe akabalilo kosa, Umwene alipelaga Mwene ukuya nkindilisi kwa umwe ukukinda mumo Umwene aayilile pabutasi.

¹⁹⁰ Mwe bandu umwe, mwe bamo ba umwe mwaali balemale, umwe mubagile ukuketa nakamo akakindane pa kabalilo, umwe mubagile ukusita kuketa ukukindana nakamo. Keta iki Abrahamu aabombile. Kitikupela akakindane nakamo iki; ikyo kikaya iki ugwe kuketa. Ugwe utikuketa ku fyakwipilika. Keta ku iki Umwene aayobile. Linga ugwe kuyoba, “Une ngali ngwipilika ububabe,” ikyo kikaya nakyo nakimo ikyakubomba ni kyene. Ugwe ubombile iki Kyala aayobile ukuti ubombe. Muketile, komma ukuketa ku ikyo. Keta ku iki Umwene aayobile. Kyala aatile ikyene kyaali lulo! Une ngwitika ikyene. Umwe bule? Ni ndumbula yangu yosa, une ngwitika ikyene.

¹⁹¹ Untwa Kyala abasayege umwe mpaka une nsababone umwe kangi. Inyiputo syangu sili kwa umwe; ubusiku butikuya butitu fiyo mma, ifula yitikugwa fiyo mma. Une ngubiputilaga umwe. Umwe munyiputilege une. Mpaka uswe twagane kangi, Kyala abasayege umwe. Lilino unkundwe uyu ikutima, muketile. 

UKUPÓKA IKIPÁTA KYA NDÚGU UKUFÚMA PA LUGÉLO KYA64-0322
(Possessing The Gate Of The Enemy After Trial)

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Ndungu pamusi, Marichi 22, 1964, ku Denham Springs High School mu Denham Springs, Louisiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org